


«la chint betg cun ena ghera totala an Europa»



Clers plets digl divisiunari Lucas Caduff per l'armada e pigl teir.



A pled è er nia Leo Thomann, igl mastral digl cumegn da Surses.

Gion Nutegn Stgier/FMR

Grond interess per la radunanza generala a Salouf. Nias an rotscha èn betg angal igls tiradours, mabagn er la prominenz politica era ferm represchentada. Organizada è la radunanza neida dall'Uniun da tiradours Surses e chegl an moda perfetga.

Dus onns è la Federaziun grischuna digl sport da teir gia da renunztgier alla radunanza generala an furma fisica perveia dalla pandemia. Uscheia è igl interess per la 142avla radunanza generala da sonda passada a Salouf sto fitg grond. Preschaints èn stos 130 delegos dallas uniuns da teir e vers 70 giasts anvidos. Darar on tantas persungas dalla politica piglia part ad ena radunanza generala dall'uniun tgi reunescha igls 5000 tiradours digl noss cantun. An en colp tanta prominenz politica è la vischnanca da Salouf strousch vasia eneda. Catto la veia an Surses è er Aita Zanetti, la presidenta digl Cunsegl grond. Preschaints eran er igls dus cunsigliers guvernativs Marcus Caduff e Peter Peyer. Tranter igls giasts eran er igls dus candidats per la regenza grischuna Martin Bühler e Roman Hug. Vasia ins è alloura er blers candidats e candidatas tgi candideschan per egn digls 120 posts aint igl parlamaint cantunal. Er dalla parteida è sto cunsiglier naziunal Martin Candinas. Anvido alla radunanza generala è er sto Leo Thomann, igl mastral digl cumegn

da Surses. El è preschento igl cumegn e puschia igl bavegna dall'antiera populaziun.

Gronda solidaritad per la famiglia Wolf da Trun

Aint igl sies pled da bavegna è Carl Frischknecht, igl president dalla Federaziun grischuna digl sport da teir, catto plets da condolientscha fitg profonds per la famiglia Wolf da Trun, tg'ò pers sies fegl Silvan Wolf antras en accident tragic cun en'arma. La solidaritad davart digls tiradours e davart dallas persungas dalla politica anvers igls pertutgias digl accident trest è stada exemplarica all'antschatta dalla radunanza generala a Salouf. L'antiera sala è sa dulzada dallas soptgas per mussar l'attaschedad anvers la famiglia Wolf e la vischnanca da Trun.

Lod per la furmaziun digls tiradours giovens

Sa drizzada alla raspada da tiradours e represchents dalla politica è er Aita Zanetti, la presidenta digl Cunsegl grond. Durant igl sies pled è ella sa dumandada quants Banadetg Fontanas tgi detta anc oz. La deputada è cunzont ludo la furmaziun e scolaziun digls tiradours giovens tgi las uniuns da teir fetschan an moda exemplarica. Els ampren dan la relaziun tar l'arma, tge tgi siertad montada, d'aveir pazientzga e d'aveir responsabladad. Er saptga mintgign tge tgi montada da perder e da gudagner. Ultra da chegl fetschan tot igls participants e participantas digl curs da giovens er ena bunga experientscha tge tgi societad e cuminanza signifitgeschan.

La dretga maseira digl îgl

Cunsiglier guvernativ Peter Peyer è scumanzo igl sies pled cun tarmetter la pi profunda consolaziun alla famiglia Wolf da Trun. El giaveischa allas famiglias la forza duevla per survantscher chella plaia, malaveta e dolour. Detg è el alloura er tgi igl teir vegia blers aspects comunabels cun la politica. Er tar la politica dovrigl scu aint igl stand da teir la dretga maseira digl îgl, da survantscher seia la pressiuin, i dovra blier exercezi e betg igl davos vegia er mintga tiradour da stimar tschertas valours. Tigl teir scu er tar la politica seia en tschert respect indispensabel, confidanza dastga er betg mantger, en manevrar solid cun l'arma totga vetiers ed er la lavour da cuminanza dastga betg mantger, gist scu tar la politica.

En virus ed er ena ghera ruignan la stabilitad

Divisiunari Lucas Caduff, igl cumandant dalla divisiun territoriala 3, è detg tg'el seia nia gugent a Salouf. Tranter igls tiradours sa catta el fitg bagn. Chels muments an cumpagneia cugls tiradours totgan tigl bels scu divisiunari. Igl Sursilvan è detg tg'en virus ed er ena ghera ruignan la stabilitad d'ena tera, da lour populaziun e da tot igls pertutgias. El è er detg tgi l'armada persequitescha la situaziun an Ucraina a moda seriousa. Da preschaint chinta el betg cun ena ghera totala an Europa perveia dalla situaziun an Ucraina ed an Russia, è detg igl divisiunari. Tgi detta proximamaintg en armistezzi crei Lucas Caduff er betg.